

舊唐書逸文

舊唐書逸文卷十

甘泉岑建功輯

列傳六十九

崔祐甫

中書園蔬日給於衆官者主事白常袞減其數崔祐甫怒訶主事曰此相公之命祐甫大詬曰門下侍郎安得理中書之蔬叱左右踏主事而拽之自是與袞常不平

御覽九百七十六 案祐甫傳云袞多駁下言數相侵此條當是彼處逸文

列傳八十四

馬暢

馬暢燧之子暢以第中大杏饋竇文場文場以進德宗德宗未常

見頗怪暢令中使就封杏樹暢懼進宅廢爲奉城園

事類賦注二十六 御覽九百六十八馬下無暢字常作嘗城作誠 案御覽引作唐史 又案暢傳云今奉誠園亭館卽暢舊第也此條當是彼處逸文

列傳九十一

田悅

建中二年田悅攻臨淄守將張伾以軍士連戰已苦府藏已竭私產亦罄而賞之不賙乃飾其愛女出示于衆曰室家所有一女而已請估而給焉軍中感之曰願以一死鬪不敢言賞遂大破之

御覽二百八十一 案德宗紀建中二年七月田悅攻臨洛守將張伾城守據忠義張伾傳云鎮臨洛蓋淄與洛皆洛字之訛通鑑載此事亦在建中二年七月洛正作洛冊府二百七十三

叙此事同而文異建中二年作建中初臨洺作洺州 又案悅傳云臨洺將張仝爲賊所攻禦備將竭此條當是彼處逸文 又案張仝傳與此條事同文異故定爲悅傳逸文新書悅傳亦載此事

列傳九十八

裴垍

憲宗問宰臣爲理之要何先裴垍對曰先正其心上深然之

御覽三百七十六 通鑑載此事於元和三年九月冊府一百四在三年十一月憲宗作帝無何先二字上作帝會要五十一年月與冊府同憲宗作上理作治裴垍上有宰臣二字 案垍傳云皆蒙垂意聽納此條當是彼處逸文

列傳一百二

王栖耀

王栖耀性謹厚善騎射始起兵涉寇境太深遇遊騎四合百步內立表俾之環視發必破的虜相顧恐懼徐而解去嘗獵會稽山中有逸林白額獸卒起草中應弦而斃在蘇州嘗與諸文士遊虎邱寺平野霽日先一箭射空再發貫之江東文士自梁肅已下歌咏焉

御覽二百七十六 冊府八百四十六同惟山下無中字白上無逸林二字已下作以下 案新書栖耀傳末畧載此事疑御覽此條乃舊書栖耀傳末逸文御覽耀字乃耀字之訛

列傳一百十三

孟簡

長慶中孟簡代崔羣爲戶部侍郎是官有二員其判使案者別居

一署爲之左戶元和以還號爲清重之最宰輔登用多由此而去
御覽二百十七 冊府四百五十七孟簡在長字上爲之作謂
之由作繇去下有故羣人相以簡代焉八字又四百五十八亦
叙此事而文較詳自代崔以下約同案下無者字爲亦作謂去
下亦有故羣至代焉八字又四百八十三長慶作元和餘與四
百五十七同 案簡傳云元和十二年入爲戶部侍郎此條當
是彼處逸文長慶中乃元和中之誤新書簡傳叙此事亦在元
和時

列傳一百十五

韋夏卿

韋執誼時爲翰林學士受賕爲人求科第夏卿不應執誼乃探懷
中出金以內夏卿袖夏卿驚曰吾與若賴先人德致名位幸各已

達豈可如此自毀懷擺袖而去執誼大慙

御覽八百十 案冊府四百八十二時上有德宗二字爲下有
右拾遺充四字學士下有性貪婪詭賊從祖兄夏卿爲吏部侍
郎執誼十七字賕作賂金上無出字若作汝德上有之字致下
有其字已達作以達毀上無自字下無懷字擺袖下有引身二
字慙下有恨字 又案夏卿傳云徵夏卿爲吏部侍郎此條當
是彼處逸文新書夏卿傳叙此事亦在爲吏部侍郎時
列傳一百二十九

韋昭度

太宗在藩嘗爲尙書令其後人臣莫敢爲遂廢其官廣德元年代
宗以親賢有大勲遂特拜爲尙書令

御覽二百十 案昭度傳云先是王行瑜求爲尙書令昭度奏

議云國朝已來功如郭子儀未省曾兼此官乃賜號尚父此條當是彼處逸文 又案代宗紀德宗紀職官志郭子儀傳皆與此條事同文異故定爲昭度傳逸文新書昭度傳亦云太宗由是卽位後人臣無復拜者郭子儀有大功嘗授之固辭免是其明證

列傳一百三十三

外戚

太平公主

永崇二年太平公主降駙馬薛紹以萬年縣爲禮會之所公主輅車自興安門南至宣陽街之西夜設燎炬烈焰相屬夾路槐樹多有死者

御覽九百五十四 案永崇據高宗紀當作永隆此蓋沿唐史

避元宗諱之文 又案太平公主傳云初永隆年降駙馬薛紹

此條蓋卽彼處逸文

唐隆元年勅公主置府近有勅總停太平公主有崇保社稷功其鎮國太平公主府卽宜依舊酸棗縣袁楚客奏記於中書令魏元忠曰女有內男有外男女有別剛柔分矣中外斯隔陰陽著矣豈可相濫哉然而幕府者丈夫之職非婦人之事今諸公主並開府建僚崇置官秩若以女處男職所謂長陰而抑陽也而望陰陽不僭風雨不爽其可得乎竊謂非致遠之計垂久安之策書曰事不師古以克永世匪說攸聞此之謂也君侯不正誰正之哉

御覽一百五十四 會要卷六停下有其字縣下有尉字公主上無諸字開府上無並字官上有法字若下有親王二字僭作僖係唐隆元年六月二十六日事通鑑載公主開府置官屬在神龍二年閏正月而叙酸棗尉袁楚客致書元忠卽在是年三

月新舊書本紀公主開府年月與通鑑同新書元忠傳楚客致
 書亦在神龍二年今以通鑑及新舊書核之景龍元年九月元
 忠貶務川尉行至涪陵而卒事在唐隆元年之前是公主停置
 府太平依舊之勅與楚客之上書斷非一時之事通典三十一
 引此勅雖屬于景雲元年六月而于注中引楚客此書並未著
 明何時非以楚客上書卽在是年御覽及會要乃誤爲聯屬也
 於酸棗尉上當另補年月方合冊府八百三十二作神龍初正
 與通鑑新舊書相符蓋公主開府在神龍二年閏正月楚客上
 書則在二年三月耳冊府載此書全文女有內上有又聞二字
 下有則字男有外下有傳字新書元忠傳及全唐文一百七十六傳作傳是中外作內
 外豈可下無相字全唐文同府在建字下通典及全唐文同崇作悉全唐文崇置下
 有法字若字下抑上無而字僭作愆通典亦不爽作無爽通典及全
 有親王二字

唐文同新書作時若久安作久長世作代全唐文同謂作說君侯上有此則朝

廷之二失七字全唐文同又案太平公主傳載神龍二年置公主

府事又載唐隆元年加實封事此條逸文似當屬於彼處

列傳一百三十四 宦官

高力士

德宗建中初誤以高力士養女楊氏婦爲沈太后是時沈氏故老已盡無識太后者上密使中人就洛陽視高氏年狀頗同曩時太后嘗削瓜哺上刃傷左拇指高氏嘗剖瓜亦傷左拇指中人皆闕官女子且非審識太后見上仁孝有殊喜莫敢沮者高氏辭曰實非太后具陳族姓內外以自明

御覽九百七十八 案通鑑叙此事在建中二年二月御覽此條似當附見力士傳末

列傳一百三十五上

良吏上

高智周

高智周之少也與來濟郝處俊孫處約同遊寓于揚州江都人石仲覽傾產以待之嘗引相工視濟等相工曰四人皆宰相也而石氏不及見焉然來早貴而末途屯蹕高晚達而最爲壽考夫速登者易顛徐進者少患天之道也仲覽貞觀末爲兵部郎中卒後濟等乃貴皆如相工所言

御覽七百三十一 案智周傳云智周少與鄉人蔣子慎善同

詣善相者曰明公位極人臣而充嗣微弱蔣侯官祿至薄而子孫轉盛此條當是彼處逸文 又案冊府八百六十之少也作少時待下無之字嘗上有又字視作觀考作耆進作達濟等上有而字大唐新語卷六叙此事前並載有智周及處約等四人

嘗因夜臥各言其志一事又云石覽宣城人而家於京都者京都蓋江都之訛 又案新書智周傳敘此事亦在蔣子慎事之前

韋機

韋宏機爲司農少卿受詔檢校東都營田園苑之事高宗謂之曰兩都是朕東西二宅也今之官館隋代所造歲序旣淹漸將頽頽欲有修造又費財力如何宏機奏曰臣任司農向已十年前後省費今見貯錢三千萬貫若以供葺理可不勞而就也上大悅

御覽二百三十二 會要三十叙此事畧同機上無宏字三千作四十係上元二年事 案機傳云超拜司農少卿兼知東都營田又云上元中兼司農卿檢校園苑機卽宏機去宏字者避孝敬皇帝諱此條當是彼處逸文新書宏機傳亦載此事 又

案冊府六百二十亦無宏字高宗誤作高祖三千作三十上作帝

列傳一百三十八 孝友

裴子餘

開元中贈左丞相程行謚曰貞岐王府長史裴子餘謚曰孝同時列上中書令張說省之曰程裴二謚可謂謚之無愧也

御覽五百六十二 會要七十九中作十四年在謚字下左上
有尙書二字程上有廣平郡公四字也作者冊府五百九十五
無開元中三字左上亦有尙書二字謚下有卒字在贈字上岐
王上有與字謚之作議之也亦作者 案子餘傳云十四年卒
謚曰孝此條當是彼處逸文新書子餘傳亦載此事於傳末

列傳一百三十九上 儒學上

歐陽詢

歐陽詢書不擇紙筆皆能如意褚遂良須手和墨調精紙良筆方書

事類賦注十五 案新書詢傳之未載此事疑御覽此條乃舊書詢傳逸文

張後允

張後允嘗侍太宗講後爲睦州刺史因入朝乞骸骨太宗召問曰朕與卿刺史資以自養何謂卽求致仕後允對曰年老筋力不逮望得私第時見闕庭太宗曰卿氣力猶強欲何官也後允陳謝不敢太宗曰朕昔從卿讀書卿今日從朕求官但言所欲不相違也時國子祭酒缺後允奏言之因授國子祭酒

御覽二百三十六 冊府一百七十二叙此事太宗作帝下同

逮作健得下有還字力上無氣字在官燕王府司馬之後新書
後允傳亦有此事而舊書後允傳不載必是逸文當在拜燕王
府司馬之下遷國子祭酒之上還字當改爲因授二字 案御
覽張作許誤又冊府八百九十九無嘗侍太宗講後六字後允
俱作張餘同

列傳一百四十上

文苑上

劉藏器

劉藏器爲侍御史時衛尉卿尉遲寶琳抑人爲妾藏器奏請還其
父母上旣可其奏寶琳私奏乞之上又從之藏器復執奏上又可
之寶琳又請如是三藏器進言曰法者海內之懸衡上下之所共
若刑罰不中則人無所措手足陛下若用捨恣情愛憎由已則國
之刑憲何所施陳今寶琳請陛下從之臣執奏陛下亦從之今日

從之明日又改之欲令下人何以遵奉夫人無信不立匹夫匹婦
尙不可失信况爲天子安可戲言今陛下二三其言處分不定臣
恐四海之內無所適從上竟從藏器所奏

御覽二百二十七 案新書藏器傳記此事在高宗時舊書藏
器傳但云亦有詞學官至宋州司馬此條必其傳內脫文

崔行功

祕書少監崔行功未得五品前忽有鸛鶴銜一物入其堂置案上
而去乃魚袋珎數日加大夫

御覽九百二十三 案行功傳云改爲祕書少監此條當是彼
處逸文

楊德幹

附楊
炯傳

楊德幹高宗朝爲萬年令有宦臣恃貴寵放鷄不避人禾稼德幹

擒而杖之二十悉捩其鵠頭臣者涕泣袒背以示於帝帝曰爾情知此漢惇何須犯他百姓竟不之問

御覽九百二十六 案炯傳云伯祖虔威虔威子德幹高宗末歷澤齊沐相四州刺史治有威名此條當是彼處逸文

王勃

王勃幼常夢人遺之黑丸盈袖後文章大進

事類賦注十五 案勃傳云六歲解屬文構思無滯此條當是彼處逸文

列傳一百四十中 文苑中

陳子昂

陳子昂上書言政理曰元氣者天地之始萬物之母王政之大端也天之道莫大乎陰陽萬物之尊莫大乎黔首王政之貴莫大乎

安人故人安則陰陽和陰陽和則天地平而元氣正矣是以古先
帝王見人之通於天地天人相感陰陽相和災害之所不生嘉祥
之所以作也遂則象於天則成於地輔相天地之宜以左右民於
是養成羣生奉順天德故人安其俗樂其業甘其食美其服陰
陽大和元氣已正天地降瑞風雨以時矣

御覽六百二十三 案此奏御覽係節引全唐文二百十三母
作祖之道上有地字尊作靈而元氣上仍有天地平三字而作
則帝王作帝代通於天地地作也下有天之應乎人也六字作
也作遂作遂則作則觀則成作察法輔相上有財成天地之道
六字已正作以正天地降至時矣作天瑞降地符昇風雨以時
草木不落龜龍麟鳳在郊藪矣 案新書子昂傳此事在擢麟
臺正字之後諫討雅州生羌之前御覽此條爲舊書子昂傳逸

文其次第似亦當如此

列傳一百四十一

袁天綱

李義府僑居於蜀袁天綱見而奇之曰此郎貴極人臣但壽不長耳因請舍之託其子曰此子可七品願提拔之義府許諾因問天綱壽幾何對曰五十二此外非所知也安撫使李大亮侍中劉洎等交薦之召見拜監察御史後位至宰相

御覽六百三十二 大唐新語卷七綱作罡下同此郎下有君字此子下無可字願上有相字下有公字提拔作提挈二下無此字交作連召見下卽載令詠烏事拜上有自門下典儀超六字後位至宰相作其後位壽咸如天綱之言 案天綱傳云天綱相人所中皆此類也此條似當列於其前

孫思邈

貞觀中太宗幸甄權宅權潁川人醫術爲天下最孫思邈師之以授鍼法時年二十三歲

御覽八百三十 案據甄權傳二十當作一百係貞觀十七年
事冊府五十五叙此事二十亦作一百在貞觀十一年又八百
五十九叙甄權事潁川人作許州扶溝人亦云貞觀十七年太
宗幸其家權年一百三歲 又案思邈傳云及太宗卽位召詣
京師云云此條當是彼處逸文

列傳一百四十四

突厥上

處羅可汗欲分兵大掠中國羣下多諫處羅曰我父失國賴隋得
立恩不可忘時處羅久疾痺隋義城公主有五石餌之俄而處羅

發疽死

御覽七百四十三 案突厥傳云俄而處羅卒此條當是彼處逸文新書突厥傳亦載此事於處羅傳末

列傳一百四十六上

吐蕃上

吐蕃國在吐谷渾西界其春夏軍糧資海魚以給之

御覽九百三十五 冊府九百六十一西界作西南給下無之字 案吐蕃傳上其地氣候大寒不生秔稻云云此條及下三條似彼處逸文

吐蕃國有藏河去邏些三百里東南流衆水湊焉南入崑崙國其
中有魚似鱒而無鱗

御覽九百三十七 冊府九百六十一同

吐蕃土風寒苦物產貧薄所部邏婆川唯有楊柳人以爲姿更無草木

御覽九百五十七 事類賦注二十五婆作娑姿作資通典一百九十亦作羅婆姿亦作資更無草木作絕無大樹木在唯字上會要九十七與通典同惟樹木上無大字冊府九百六十一叙此文畧異羅婆作羅些更無草木作無樹木唯字下語較御覽詳又九百六十二引與御覽同係咸亨三年吐蕃使仲琮來朝對高宗語吐蕃上有但字姿作資

吐蕃有草名速古芒葉長二寸狀如針蒿每莖不過三四葉其莖蔓其花其根連珠如麥門冬有鼠長於常鼠每二三十同穴至秋鼠皆收此草爲藏多者至數石俗亦掘草根食之而留給鼠糧其國禁殺鼠殺者輒加罪俗亦愛之不殺也

御覽九百十一 會要九十七叙此事如針作若斜葉下無長字長於上有尾字通典一百九十叙此事較御覽畧如針亦作若斜長上亦有尾字冊府九百六十一同惟速作蓮其花下有黃字冬下有味辛性微冷五字二三作三二至秋下有後字衆鼠作鼠皆此草下有根字俗亦作俗嘗食之作而食者字上仍有鼠字輒加下有其字愛之作愛而殺下無也字

常魯使西蕃烹茶帳中謂蕃人曰滌煩療渴所謂茶也蕃人曰我此亦有命取以出指曰此壽州者此顧渚者此蘄門者

事類賦注十七 御覽八百六十七常上有初字謂蕃人曰作蕃人問曰何爲者魯曰 案御覽引作唐史 又案此條文義似是吐蕃傳逸文但次序前後難定今姑錄於此以俟考

列傳一百四十七 南蠻 西南蠻

墮婆登

王之所居堅木爲城造大屋重閭覆以椶櫚皮所坐牀悉以象牙爲之亦以象牙爲席食以手撮之音古患反又以椰樹花爲酒飲之亦醉有山穴海湧而出鹽國人取食其國人有毒與常人同止宿卽令身生瘡與之交會便死若涎液霑者草木卽枯其人死身不臭不爛

御覽七百八十八 案御覽此條上文尙有墮婆登國在林邑南云云以與今本約同故不全引通典一百八十八叙此作訶陵國王之所居上有去眞臘之南大唐貞觀中遣使獻金花等物十七字堅作豎閭作閭欄下無皮字坐作座無亦以以下六字海湧作每涌取食作取之以食人有毒作別有毒人卽令作則令會作合便下有卽致二字霑者作霑著身在死字上不臭

在不爛下又於墮婆登下云風俗與訶陵同地亦東與訶陵接
會要一百叙此亦作訶陵王字上有在真臘之南海中洲七字
閻亦作閻餘較御覽畧椰樹花作椰花椰子其國人有毒作有
毒女同止宿作居止宿處涎作旋者亦作著冊府九百五十九
亦作訶陵王字上有在真臘之南五字王之作其王堅作豎閻
作閻所坐上有王字下有之字食以手撮之作食不用匙箸以
手撮之又以椰作以柳醉上有得字海湧作每涌取下亦有之
以二字人有毒作別有毒女人卽令下有人字身下有上字便
作卽致涎作漩者亦作著身在死字上不臭下有亦字 又案
今本墮婆登國傳無此一段而訶陵國傳云豎木爲城作大重
屋云云與御覽此條約同惟不言山海出鹽國人有毒耳墮婆
登之風俗旣與訶陵相同則此一段亦不妨兩見通典會要冊

府或屬之訶陵或屬之墮婆登可以彼此參考新書訶陵傳所述與御覽此條約同墮婆登傳云俗與訶陵同亦可互證

南詔

南詔理無刑名桎梏之具罪以竹五本束之伏犯者撻其背

御覽九百六十二 事類賦注二十四罪作有罪者 案驃國傳云其理無刑名桎梏之具犯罪者以竹五十本束之復犯者撻其背與此條事同而國異新書驃國有此事而南詔傳無之疑此條乃御覽誤引今姑存之

列傳一百四十九下

北狄

鐵勒

初薛延陀之將敗也有一客乞食於主人主人引入帳令妻具饌其妻顧視客乃狼頭人也妻告鄰人共視之狼頭人已食主人而

去相與逐之止鬱督軍山見二人追者告其故二人曰我則神人也薛延陀當滅我來取之追者懼而退走延陀竟敗於鬱督軍山御覽八百八十二 九百九初薛至敗也作薛延陀部落有上有嘗字主人下有者字引下有與字人也下有主人不之覺五字我則神人也作我是也我卽神人退作返無延陀竟以下九字 案鐵勒傳云以薛延陀亡散殆盡云云此條當是彼處逸文

列傳二百上

安祿山

潼關之戰哥舒翰在河北高阜上觀軍陣進退之勢于時有般糧船在河北岸左右言取船渡兵可得遂令將船百餘隻到南岸渡人舟中之指可掬登船爭渡者不可勝數每滿卽沉如是登船沉

者數十渡餘軍盡散走還入關

御覽三百二十三 冊府四百四十三般作搬渡兵下有土字
南岸上有河字餘同又四百四十五節叙此事文畧異 案祿
山傳云會哥舒翰自潼關領馬步八萬與賊將崔乾祐戰於靈
寶西爲賊覆敗此條當是彼處逸文下條仿此 又案哥舒翰
傳與此條及下條事同文異故定爲祿山傳逸文

安祿山之亂哥舒翰領兵馬步十五萬賊將崔乾祐會戰初哥舒
翰造羶車以羶蒙其車以馬駕之畫以龍馬之狀五色相宣以金
銀飾其畫獸之目及爪將衝戰馬因其驚駭擬從而掎角攢戈矢
而逐之賊知其計積薪芻於隘路候羶車至順風縱火焚之駕馬
奔駭燒羶車薪芻煙焰昏黑兩軍不相辨我師謂賊軍在煙焰中
遂集弓弩併力射之賊軍抽退盡日矢盡方覺無賊我師衆從關

門六七十里路狹北抵黃河南抵古岸排蹴進不得賊抽軍從南山設疑曳柴揚塵以伺羅諸兵習險直透黃河古岸橫截我師我師敗績沉河而死者十有三三

御覽三百二十三 案賊將上黨有與字冊府四百四十三龍馬作龍虎宣下有又字戰馬作戰焉矢作夾隘下無路字燒瓊車下有及字在煙焰下有之字我師下無衆字六七下無十字北作比南下抵字作是伺作同諸兵作詣眞習險下有之衆二字死下無者字

列傳二百下

黃巢

僖宗時盧攜鄭畋爲相不相得議黃巢事忿爭盧拂衣而起擲硯相投也

事類賦注十五 案巢傳云時宰臣鄭畋與樞密使楊復恭奏欲請授同正員軍將盧攜駁其議請授率府率如其不受請以高駢討之此條當是彼處逸文 案盧攜鄭畋傳與此條事同文異故定爲巢傳逸文

舊唐書逸文卷十一

甘泉岑建功輯

列傳

王行本

王行本仕隨以軍功爲朝散大夫堯君素之鎮河東也令行本統
精甲七百人及君素被誅於東樓行本率兵赴之不及因捕殺君
素諸黨屬與數百人皆誅之後兵出戰官軍高祖更令將軍秦武
通擊之武通令軍中無得泄其謀於是掘長圍以逼之武通謂掘
圍者曰若見賊但疾走以避之行本果出兵掘圍者走行本奔數
里通率騎橫出擊之賊衆潰因縱兵乘之殺七百餘人自此兵勢
漸弱太宗求得其所親婦人遣入城喻意行本曰罪戾旣深自知
不免止當逃竄山谷耳因潛引武周又求援於竇建德武周遣其

將尋相以兵援之太宗邀擊大破之行本窮急糧盡謀欲突圍而
出人無從者遂面縛請降

御覽三百二十四 案後兵句疑有誤武周上當補劉字冊府
三百六十五節引秦作楊疾走作退走數里作趨之通率上有
武字乘之作乘勝七百下無餘字係武德三年事 又案行本
初從堯君素乃隋之舊將後附劉武周竇建德又近於割據之
羣雄以史例言之當列於有唐諸臣之前 又案此卷所載諸
人舊唐書原文本皆無傳不知其當在何卷今但以列傳爲綱
而不臆定卷數所有諸人次第以時代先後約畧叙之其可歸
外戚循吏等傳者亦各彙附於後而不另標名目以從闕疑之
義焉

張瑾初仕隋歷職顯貴煬帝被圍於鴈門也瑾以驍果出城擊賊一日九捷煬帝登城望之大悅賜物二千段

御覽三百二十七 冊府三百九十六段下有拜右翊衛大將軍七字 案突厥傳上云武德八年七月又襲將軍張瑾子太原瑾全軍並沒脫身奔於李靖蓋瑾先爲隋將後爲唐將與屈突通等相似也

何潘仁

何潘仁西域胡人也家富於財潘仁厚自奉養引致賓客煬帝時嘗犯法懼罪遂亡入司竹園鳩集亡命衆至數萬及義兵起求得平陽公主而奉之以應義師

御覽八百二十四 冊府三百四十五叙此事較御覽詳煬帝時下有爲幕士鬱鬱不得志後九字園下有中字 案平陽公

主傳云時有胡賊何潘仁聚衆於司竹園自稱總管未有所屬
公主遣家僮馬三寶說以利害與此條可以互證三寶旣附見
於柴紹傳則潘仁亦可立傳當以此條補其闕

姜寶誼

姜寶誼武德初拜武衛大將軍尋爲井鉞將軍劉武周將黃子英
往來雀鼠谷高祖令寶誼擊之子英數以輕兵挑戰寶誼兵纔接
子英輒遁如此者再三寶誼悉衆以逐之伏兵發軍遂大敗寶誼
爲賊所擒後得逃歸至是與裴寂拒宋金剛戰始合寂弃軍而走
兵遂大潰寶誼復爲賊所擒高祖初聞其沒也泣曰寶誼烈士必
不生降賜其家物千段米三百石寶誼後謀背賊事洩遇害臨死
西向大言曰臣無狀負陛下被屠潰是所甘心但敗軍喪師九泉
所恨及賊退高祖遣使迎其柩諡曰剛

御覽三百二十六 冊府一百四十八與上有爲右武侯大將軍六字裴寂上有尙書右僕射五字宋金剛下有于介州三字又三百七十三武德初作武德二年與上及裴寂上與一百四十八同惟候作衛介州作汾州戰始合以下悉與御覽同惟陸上無負字又四百四十五武德初上有高祖二字下無拜武以下七字劉武周上有時字高祖作帝輕遁作徑遁又四百四十七引與御覽同惟子英作子英遁作逕後得作復得 案新書姜寶誼附裴寂傳而舊書無之當以此條補其闕

段綸

段綸兵部尙書綸少任俠落拓不修細行仕隋左親衛隱太子見而悅妻以瑯瑯長公主舍高祖之舊第數聞鼓吹之音視之無所覩綸謂主曰聞圖讖李氏當王命今於第內有此禎祥必而家應

錄之徵也

御覽一百八十一 案新書高密公主傳嫁段綸綸隋兵部尙書文振子據此則御覽兵上當有隋字尙書下當有文振子三字冊府七百六十六無兵部以下十四字左上有爲字悅下有之字王下無命字徵也下有及義兵西邁綸於藍田聚結兵馬得萬餘人迎接大軍拜金紫光祿大夫領親信左右從平京城封龍岡郡公四十二字

田畱安

田畱安拜魏州摠管劉闢之亂也來攻州城于時山東豪猾多殺長吏以應賊百姓洶洶咸懷異志凡諸守皆以心腹自衛多所猜防由是上下情隔怨叛者多畱安獨撫結所部示無疑阻凡有白事者無間疎遠皆至臥內謂人曰吾與卿輩同爲國守自宜一心

無爲疑貳也必欲弃同卽異背順歸逆亦任卿輩斬吾頭而去矣
城中父老遞相誠勵子弟曰田公以赤心相付何得負之由是人
情遂固州人苑竹林者劉闢之黨也初有異圖畱安陰知之而不
發其事因引置左右委以關口口口竹林感其意遂歸心焉卒收
其力用

御覽二百五十一 案通鑑叙此事於武德五年十二月委以
下有管鑰二字疑卽在御覽三空字之中冊府四百二十二拜
作武德中爲闢上有黑字是咸懷作人懷守皆作守將腹在心
上由作繇下同凡有作但有無閒作無問謂人上有每字公以
上無田字又六百八十拜作爲闢上亦有黑字亂下無也字洵
洵作兇人凡諸下有郡字餘與四百二十二約同冊府兩引此
事俱無州人苑竹林以下云云又案劉闢之黨也闢上亦當有

黑字

周法明

黃州摠管周法明率兵擊輔公祐遇張善安阻兵夏口法明屯荊口鎮登戰艦與所親飲酒善安遣刺客數人詐爲漁者乘輕舟而至見者不以爲虞遂殺法明而去

御覽二百九十二 新書高祖紀及通鑑紀此事在武德六年

十一月壬午

張鎮周

張鎮周拜舒州都督舒州卽其本邑鎮周乃多市酒肴就望江舊宅盡召故人親戚與之酣宴散髮箕踞敦疇昔之歡十日贈以錢帛旣而垂泣謂親賓曰比者張鎮周與故人爲歡今日以後舒州都督治百姓耳官民禮隔不得交違日與之訣自是親戚有犯法

一無所縱州境因茲肅然

御覽八百四十四 冊府六百七十四 鎮周作鎮州下同州下並有同安人也四字拜作武德中爲邑下有也字比作此官民作居民又七百八十二引同惟錢帛作金帛官民又作君民無自是以下十七字 案通鑑武德八年正月丙辰以壽州都督張鎮周爲舒州都督下文所言與此條約同

賈嘉隱

賈嘉隱年七歲以神童召見時太尉長孫無忌司空李勣於朝堂立語戲謂嘉隱曰吾所倚者何樹嘉隱對曰松樹勣曰此槐也何忽言松嘉隱對曰以公配木則爲松樹無忌連問之吾所倚何樹嘉隱對曰槐樹無忌曰汝不能矯對耶嘉隱應聲曰何須矯對但取其以鬼配木耳

御覽九百五十三 事類賦注二十四太上無時字於朝堂作
與朝堂戲下無謂字兩何樹下皆有也字兩嘉隱下皆無對字
兩松字下皆無樹字忽作以槐樹作槐也嘉隱下無應聲二字
但取其作便取大唐新語卷八戲謂嘉隱作李戲之勣曰作李
曰兩嘉隱下亦無對字連問之下有曰字吾所倚下有者字矯
上有復字耳字下有勣曰此小兒作獠面何得如此聰明嘉隱
又應聲曰胡面尙爲宰相獠面何廢聰明勣狀貌胡也三十七
字

徐慶

太宗時徐慶爲征遼判官有一典不得姓名慶在軍忽夢已化爲
羊爲典所殺覺懼流汗至曉典判案慶問曰汝夜有夢否典云夢
公爲羊某屠之由是慶不食羊則天時慶至司農少卿雍州司馬

時典已任大理獄丞後慶被誣與內史令裴炎通謀應接英公徐敬業揚州反被執送大理忽見丞押獄慶流涕謂曰征遼之夢今當應之及被戮竟是丞引之

御覽四百 冊府八百九十三由作繇應接上有慶字竟下無是字

紀履忠

紀履忠爲監察御史劾奏御史中丞來俊臣犯狀有五一專擅國權二謀害忠善三贓賄貪濁四失義教禮五淫昏很戾論茲五罪合至萬誅請下獄理罪

御覽二百二十七 會要六十一有五下有焉字忠作良敦作背很作狠誅作死理作治係萬歲通天五年五月事 案萬歲通天止有二年並無五年通鑑考異引統紀與御覽會要略同

係萬歲通天元年五月事疑會要五字乃元字之誤冊府四百八十二叙此事忠誤作中犯狀作其罪賄作賂但云在則天時又五百二十引與御覽同惟很作狠 又案通典二十四年月與統紀同失義敦禮作失禮義敦很作狠餘與御覽同 又案酷吏來俊臣傳與此條文義詳畧不同故定爲履忠傳逸文

張循憲

張嘉貞落拓有大志亦不自異亦不下人自平鄉丞免歸鄉里布衣環堵之中蕭然自得時人莫之知也張循憲以御史出使還次蒲州驛循憲方復命使務有不決者意頗病之間驛吏曰此有客乎驛吏以嘉貞對循憲召以相見咨以使事積時凝滯者嘉貞隨機應之莫不豁然乃命草表又出其意外他日則天以問循憲具以實對因請以己官讓與之則天曰卿能讓賢朕豈無一官自進

賢耶乃召見內殿隔簾與語嘉貞貌甚偉神彩俊傑則天甚易之因奏曰臣生居草萊目不覩朝廷之事陛下過聽引臣天庭此萬代一遇也然咫尺之間若隔雲霧臣恐君臣之道有所未盡則天曰善遂命捲簾翌日拜監察御史開元中用之爲相

御覽六百三十二 案張嘉貞傳載此事甚略疑本有張循憲傳此其佚文 又案冊府六百五十八叙此事同而文畧異循憲作修憲下同又注引還次蒲州下無驛字召下無以字凝作疑滯下無者字應之上無嘉貞隨機四字以問循憲亦作修憲其下仍有修憲二字大唐新語卷六丞作尉出下無使字客上有好字以嘉貞對作白以嘉貞召以作召與咨以使事使作其凝作疑乃命作及命表上無草字意外上無其字讓下無與字讓賢作舉賢美矣朕豈下有可字貌上有儀字易之作異之生

居作生於朝廷作闕廷引臣作引至一遇也作之一遇隔作披
開元中作開元初以下較御覽爲詳 又案通鑑載此事在長
安二年十二月新書張嘉貞傳叙此事亦在長安中皆作張循
憲

范獻忠

蘇瓊案問鄭普思其妻有寵于韋庶人特勅令對御辨折上屢抑
瓊而申普思侍御史范獻忠厯階而前曰臣請先罪蘇瓊上問其
故獻忠曰蘇瓊國之大夫荷榮貴久矣不斬逆賊而後聞奏今使
眩惑天聰搖動刑柄而普思反狀昭露陛下曲爲申理此則王者
不死今聖躬萬福豈有兩天子耶臣請先死終不能事普思上意
乃解獻遂定

御覽二百二十七 會要六十一 蘇上有吏部尙書四字思作

恩下同折作析申作理夫作臣斬上有能字聞奏作奏聞兩作
剩係神龍三年事大唐新語卷二叙此事較御覽畧異上作中
宗下同而前作而進先罪作先斬不斬作不能先斬聞下無奏
字今使下有其字天聰作天聽曲爲作爲其則王作其反兩天
子作天臣請下無先字無上意乃解四字遂作乃定下有朝廷
咸壯之五字通鑑載此事於神龍二年十一月 案新書蘇瓌
傳亦載此事舊書蘇瓌傳所叙與此條文義迥異故定爲獻忠
傳逸文

韓琬

景雲二年監察御史解琬陳時政曰臣聞國之安危在於爲政若
爲政以法雖暫安而必危爲政以德雖不便而終治夫法者智也
智所謂權宜道可以常久陛下登位今已逾年上封事者多言明

聖述太平或曰功巍巍德赫赫非唯不裨於政化亦乃陛下之厭
聞臣以爲當今風俗未甚振理政令未息煩勞陰陽未調和帑藏
失充物流離者尙想望於道路犯禁者猶繼踵於狴牢耳未聞康
哉之聲目未覩太平之事且貞觀永徽之天下亦今日之天下相
去幾何而風俗淳季相反由理之失也夫霸者任智失德與人故
大僞緣生矣然巧智之士浮詭之徒智忠者爲立身之階識仁義
爲百行之本託之以求進假之以取容口是而心非言同而意反
明君哲后亦何能盡察哉趨競之吏巧智之人欲密網以爲至公
殊不知網密而犯者衆用苛細爲勤事殊不知事細而擾愈煩賞
貪冒爲強能鄙貞正爲孤介隨波浮沈者題之以黠剛毅正直者
目之曰愚歲月漸漬日致澆浮朴散淳離流宕忘反若不匡救其
弊何由使風俗淳質厥人以康哉

御覽六百二十三 案新舊書解琬傳其官監察御史在高宗則天時至睿宗景雲二年則已官朔方軍大總管且亦無陳時政之事惟新書韓琬傳云拜監察御史景雲初上言國安危在於政云云與此條大畧相同疑御覽解琬乃韓琬之誤舊書無韓琬傳當以此補其闕 又案智忠者據新書當作知忠孝流離者尙想望於道路想望當是相望之誤

袁仁敬

大理卿袁仁敬暴卒繫囚聞之皆慟哭悲歌曰天不恤冤人兮何奪我慈親兮有理無申兮痛哉安訴陳兮

御覽二百三十一 會要六十六申上有由字係開元二十一年七月事冊府六百十八卒上無暴字無曰字以下云云通典二十五歌上無悲字餘與御覽同係開元二十一年七月事

崔昌

天寶中崔昌上封事推五行之運以國家合承周漢其周隋不合爲二王後請廢詔下尙書省使公卿議昌獨見之明羣議不屈會集賢院學士衛包抗表陳論議之夜四星聚於尾宿天意昭然上心遂定求殷周漢後爲三恪廢韓介鄒等公以昌爲左贊善大夫御覽五百九十五 冊府一百七十三崔上有處士二字使作集獨上有負字上作帝求上有乃字夫下有包爲虞部員外郎七字係天寶九載事會要二十四與冊府同惟無推五行之運五字不屈作不能屈天意作天象贊上無左字係九載六月六日事據通鑑在九載八月辛卯 案元宗紀下叙此事在天寶九載九月乙卯與此條詳畧迥異故定爲昌傳逸文 又案新書昌事附見文藝上王勃傳

劉秋子

至德中宜春郡太守劉秋子率士卒攻賊兵盡矢窮秋子張空弩大呼於軍前死戰而勝詔嘉其忠勇授淮陽太守

御覽三百十

張造

上元中度支欲取兩京道中槐樹爲薪更栽小樹先下行牒渭南縣縣尉張造牒曰召伯所憇尙勿剪除先皇舊遊豈宜斬伐乃止御覽九百五十四 事類賦注二十五上作貞行作符尉上止一縣字

李栖筠

華原尉侯莫陳怵以主郵傳優改長安尉

通鑑二百二十四注述考異所引

栖筠劾奏浩等上依違未決屬月蝕上問其故對曰臣聞日蝕修德月蝕修刑今誣上行私之罪未理此天之所以儆戒於明聖由是感悟坐愆者皆貶謫自此朝綱益振百度肅然

同上 案李吉甫傳云父栖筠國史有傳李德裕傳云祖栖筠父吉甫祖父自有傳而今本無之據考異所引明標舊李栖筠傳可補其闕冊府五百十五叙此事較詳並與上條文相聯屬上作帝下同肅然下有中朝選用帝皆密訪於栖筠栖筠盡心知無不爲云云 又案新書有栖筠傳亦載此事

嚴郢

嚴郢以舊怨與盧杞陷楊炎趙惠伯構成其罪貶炎於崖州惠伯於費州郢既報怨過當人頗不直郢後得罪至費州道左有柩殯問其主名或曰趙惠伯之殯也郢默然慙慙歲餘而卒

御覽五百五十 案新書郢傳亦載此事舊書無郢傳此條乃其逸文 又案冊府五百二十二叙此事較御覽詳至費州上有旣字有作覩主作姓或曰下有得罪二字又九百二十叙此事與五百二十二同問其下與御覽同

張著

侍御史朱放請復置朱衣豸冠于內廊有犯者御史服以彈後御史張著服之以彈京兆尹嚴郢

御覽六百八十五 會要六十一叙此事放作赦復下有舊制二字廊作廊京兆尹下有御史中丞四字郢下有於紫宸殿四字 事類賦注十二廊作廊犯下有法字彈下有之字無後御以下十四字 案冊府五百二十二侍御史上有初字請復下有制字廊亦作廊以彈下有帝許之三字後御史張著作張著

爲監察御史服之作冠豸冠尹下有兼御史中丞五字郢下亦有於紫宸殿四字 又案德宗紀上叙此事在建中元年三月庚午而文義迥異故定爲著傳逸文

臧希讓

臧希讓爲金吾大將軍骭髀好談時政屢以理體上千公卿詔令集賢院待制希讓無學術及處近地從容公卿閒強引文言以自賢而所聞知多道途得之發必差謬頗爲士子所笑

御覽二百三十七 案代宗紀云大厯四年六月丁酉以太子詹事臧希讓檢校工部尙書充渭北節度九年九月乙巳渭北節度使臧希讓卒據此則希讓乃代宗時人此條當是希讓傳逸文

王國良

曹王臯爲衡州刺史初湖南團練使辛京杲遣將軍王國良鎮武岡京杲侵刻之又虐其士卒國良以兵叛因據山河守險劫行旅以自給詔徵荆南江西黔桂兵誅之二歲不下乃以臯爲潭州刺史湖南都團練使臯率諸軍至武岡國良阻險兵不得進臯乃謂諸軍曰國良怨京杲刻害本非反也其情易不如降之乃三遺之書國良因請降未得其情臯曰其心屈矣乃捨軍自稱使者乘扁舟直造其壘曰曹王也國良遂出降

御覽三百二十四 案臯傳與此條詳略迥異故定爲國良傳逸文德宗紀建中元年四月壬戌以衡州刺史嗣曹王臯爲潭州刺史湖南團練觀察使通鑑載招降事在元年七月 又案冊府四百二十七曹上有嗣字爲衡州上有德宗建中初五字山下無河字其情易下有見字曹王上有我字

戴叔綸

貞元六年上以中和節宴百僚於曲江上賦詩以賜之百官皆和焉是歲戴叔綸爲容州刺史素有詩名上乃令錄其詩以賜之御覽三十 案德宗本紀貞元六年二月戊辰朔百寮會宴於曲江亭上賦中和節羣臣賜宴七韻與此迥異冊府一百十所引上以作二月戊辰朔以江下有亭字上賦作帝賦無以字及百官以下考新書戴叔綸傳云遷容管經略使德宗嘗賦中和節詩遣使者寵賜與此條相合疑舊書原有戴叔綸傳而今本逸之耳

呂溫

呂溫者以小吏事崔漢衡貞元初吐蕃背盟漢衡爲吐蕃所虜將殺之溫趨往以背受刃吐蕃義之由是與漢衡俱免

御覽三百七十一 冊府一百八十一叙此事較御覽詳由作
繇又八百四呂溫下無者字事下有兵部尙書四字初作三年
下有漢衡爲會盟副使七字由亦作繇又九百四十引與御覽
同惟下仍載溫畱蕃中久之始得歸云云 案新舊書皆有呂
溫傳乃湖南觀察使渭之子貞元時進士官至衡州刺史與此
呂溫姓名時代雖同而秩位迥異實非一人故定此條爲逸文

鄭珣瑜

鄭珣瑜出爲河南尹珣瑜旣入境官吏以逼降誕日珣瑜到卽後
於事乃送所獻馬賁印於路以例告珣瑜曰未上官不可遽有進
獻及旣上卽過時矣遂不獻

御覽二百五十二 新書珣瑜傳載此事所言誕日係德宗生
日舊書鄭覃傳云故相珣瑜之子蓋原有珣瑜傳而今本脫去

此條卽其中之逸文也冊府六百七十四爲上無出字降誕上有德宗二字賁作齋例上有往字過作失

順宗時宰臣鄭珣瑜韋執誼方與諸宰相會食於時中書故事丞相方食百寮無敢通見者王叔文是日至中書欲與執誼計事令直省通執誼直省以舊事告叔文叔文怒叱直省直省懼入白執誼執誼遽巡慙報竟起迎叔文就其閤語良久宰相杜佑高郢珣瑜皆停飭以待報者云叔文索飯韋相公已與之同食閤中矣佑郢等心知其不可畏懼叔文莫敢出言珣瑜獨歎曰吾豈可復處此乎顧左右取馬徑歸遂不起

御覽八百四十八 冊府三百十時作初叙此事文較御覽畧異下並載賈耽罷相云云又三百十七引與御覽約同會食於下無時字通見下無者字怒叱上無叔文二字懼上無直省二

字兩間字俱作閣報者上有有字已與作亦與莫作不上有執
誼二字 案通鑑叙此事在貞元二十一年三月新書珣瑜傳
亦載此事

齊摠

許孟容遷給事中論駁無所憚貞元末方鎮殂歿其主畱務判官
雖不代位亦例皆超擢寢以爲常十八年浙東判官武試大理評
事齊摠由是拜衢州刺史孟容以摠無出人才一旦超爲郡守非
舊制也封還詔書時久絕論駁及孟容舉職班行爲之惴恐德宗
開悟召對慰勉遂寢其事

御覽五百九十四 案德宗紀下及許孟容傳與此條事同文
異故定爲摠傳逸文

王源中

王源中字正蒙早以文學知名升進士第宏詞科累遷至左補闕
時典禁軍者不循法度至有臺府人吏皆爲追擒源中上疏其略
曰夫臺憲者紀綱之地府縣者責成之所設有罪罰宜歸司存安
有北軍勢重於南衙輦下權傾於仗內乞還法司庶守職分憲宗
可其請

御覽二百二十三 冊府四百五十九無字正至累遷十八字

遷至作遷爲疏下無其畧二字犯作罰請下有改侍御史四字
案新書源中傳亦載此事疑舊書本有源中傳御覽所引乃
其逸文下條仿此

王源中爲戶部侍郎翰林承旨學士性頗嗜酒嘗召對源中方沈
醉不能起及醉醒同列告之源中但懷憂殊無悔恨他日又以醉
不任赴召遂終不得大用以眼病求免所職

御覽八百四十六 冊府九百十四不能下無起字憂下有惕字無眼病以下七字

張平叔

張平叔長慶中爲戶部侍郎平叔狡險大言因王播以進旣掌財用常屈公利以便嬖倖多狎之旣有寵於上進退便僻雜以優諧或自稱老奴無復大臣之體嘗奏事畢降階復昇又有論奏佻盪輕脫上每爲笑容之在班列閒玩狎卽吏譁肆無忌請變權鹽法請宰相爲之使因以自求樞機之任每有內制出輒疑授已整衣冠以俟後人多笑之

御覽二百十七 冊府四百八十一長慶中作元和末侍郎下有判度支三字屈作居體作禮嘗奏作因奏上作帝俟後作候笑之下有前後散失官錢四十萬貫御史按得其實故貶之十

九字又五百十引此条至狎之止長慶上有穆宗二字侍郎下亦有判度支三字險在狡字上便作使私

薛膺

薛膺友悌弟齊爲李絳山東西道從事絳遇害齊中飛矢墜于城下膺時爲左補闕聞難不及請馳馬以赴齊歿膺與兄弟喪庠處喪過禮朝之卿大夫暨搢紳往弔者繼路聞其哀號弔者悲不能自持膺去左補闕庠去河南縣尉直宏文館與喪皆屏去外飾野服布巾終喪蹈名教者推之

御覽五百一十六 案李絳傳云出爲興元尹山南西道節度使又云乃并從事趙存約薛齊俱死焉御覽此條山東西當是山南西之誤冊府八百五十二薛膺下無友悌二字有散騎常侍致仕革之子九字弟齊下無爲李絳山東西道從事絳遇害

齊十三字不及請下有告字褒作褒下同過禮作如禮摺作緝
往弔在者字下屏去外飾野作屏居外野 案新書膺傳亦載
此事疑舊書原有膺傳御覽此條乃其逸文

李泳

李泳爲河陽所至以貪殘爲務犒宴所陳果實以木刻彩色績之
御覽九百六十四 案冊府四百五十五叙此事較御覽爲詳
爲河陽上有初任鎮武節度轉七字彩色作綵在文宗開成二
年六月 又案文宗紀下云開成二年六月丙午河陽軍亂逐
節度使李泳未言貪殘之事疑此條乃泳傳逸文

鄭居中

中書舍人鄭居中少有時名揚歷清貫晚年尤薄名利以疾辭官
恣遊名山一日搦管爲詩纔書五字曰雲山遊已徧紙猶在手筆

忽墮地而終

御覽二百二十二 冊府八百九十九 揚作敷貫作貞 案冊
府敘居中事於錢徽李逢吉等人之後蓋中葉以後之人

房穎叔

房穎叔拜天官侍郎自其高祖景伯至穎叔四代咸居選部時論
榮之

御覽二百十五 案此條房穎叔及下兩條崔希喬李直方時
代先後難定今列於列傳諸人之後公主等彙傳之前以俟考

崔希喬

崔希喬爲并州兵曹廳前叢葦有小鳥如鷦鷯來巢孕卵五色大
如鷄子數日驚毀雖見已踰於母月餘五色成文大如雞馴擾閑
暇頃之飛翔時歸舊所人都號爲兵曹鳥

御覽九百二十四

李直方

李直方常第果實若貢士者以綠李爲首芳梨爲副櫻桃爲三甘橘爲四蒲萄爲五或薦荔枝曰寄舉之首也

御覽九百七十二

太和公主

太和公主長慶元年封爲公主冊爲迴紇可敦出降愛登里邏骨沒密施合毗伽保義可汗初保義可汗旣立遣使求婚遂封第九妹爲永安公主將以降嫁其年保義可汗卒冊九妹迴體爲崇德可汗五月遣使請迎所許嫁公主朝廷封第五妹爲太和公主以降今迴紇焉雖狄人固請永安而終不許故命中書舍人王起就鴻臚寺以宣喻焉

御覽一百五十四 會要卷六元年下有二月二字迴作回下同保義上無初字而有以中書侍郎平章事崔植充冊使戶部侍郎平章事杜元穎充五禮使五月詔緣改定太和公主出降回紇事宜令中書舍人王起赴鴻臚寺宣示回紇等使六十字嫁下有焉字其年下有三月二字冊上有四月二字九妹迴體作九姓回紇朝廷下有以字紇下無焉字就作充喻作諭 冊府九百七十九叙此事事同而文異第五妹作第十妹太和下有長字 案穆宗紀及迴紇傳與此條文義迥異故定爲太和公主傳逸文

萬壽公主

大中二年以起居郎駙馬都尉鄭顥尚萬壽公主詔曰女人之德雅合慎修嚴奉舅姑夙夜勤事此婦之節也先王制禮貴賤同遵

既已下嫁臣寮儀則須依古典萬壽公主婦禮宜依士庶

御覽一百五十四 會要卷六二作四年下有二月二字詔上有其年二字已作以全唐文八十已亦作以 案宣宗紀大中四年二月皇女萬壽公主出降右拾遺鄭顥以顥爲銀青光祿大夫行起居郎駙馬都尉與此條文義不同通鑑叙此事在大中元年十一月庚午 又案鄭顥傳亦與此條文義不同故定爲萬壽公主傳逸文新書萬壽公主傳亦節引此詔

公主

凡公主封有以國名者卽國代國霍國是也有以郡名者平陽宣陽東陽是也有以美名者太平樂安長壽是也唯元宗之女皆以美名名之

御覽一百五十四 會要卷六樂安作安樂唯作惟考新書公

主傳唐代公主無封樂安者惟中宗幼女封安樂公主當從會要案此條及下條皆述公主之事而無所專屬疑序論中語今錄於此以俟考焉

建中中議公主出降之儀曰近代設氍毹帳擇地而置此乃北胡穹廬之制不可以爲佳宜于堂室中置帳以紫綾幔爲之

御覽六百九十九 會要八十三設下有以字北胡作元魏無不可以爲佳五字宜作合以紫綾幔爲之作請准禮施行係建中元年十二月二日事

馮履謙

馮履謙補河北尉有部人張懷道任江陽尉與謙疇舊餉鏡一面謙集寮吏遍視之曰此張公所致也吾與之有舊吾効官以俸祿自守豈私受遺哉昌言曰清水見底明鏡照心余之効官必至於

此復書於使者乃歸之

御覽四百二十六 冊府七百四補作爲餉作餽効作效下同
大唐新語卷三馮履謙下有七歲讀書數萬言九歲能屬文自
管城尉丁內艱十九字餉鏡一面作餉一鏡焉視之下有咸曰
維揚之美者甚嘉也謙謂縣吏十四字有舊下有雖親故不坐
著之章程九字以俸上有但字必至作必同歸之下有聞者莫
不欽尙官至駕部郎中十二字 案此條疑循吏傳逸文

李子慎

李子慎誣告其舅以獲五品其母見其著緋衫覆面牀下泣涕曰
此是汝舅血染者耶

御覽三百七十五 大唐新語卷十二覆面牀下泣涕作覆牀
涕泣耶作也 案新語此事附載侯思止等事之後新舊書思

此皆在酷吏傳疑子慎事亦當附見酷吏傳御覽此條乃其逸文

王行敏

王行敏鎮潞州劉黑闥來攻行敏自厯亭出兵拒戰擊賊破之旣而憊於野不設備賊知而掩之左右皆遁因爲黑闥所擒竟不拜黑闥怒斬之臨死西向而言曰行敏大唐忠臣也願陛下知之高祖聞而痛惜焉

御覽三百二十六 新書行敏在忠義傳而舊書無之當以此補其闕冊府三百七十三叙此事較御覽詳在武德三年斬之上有怒字西向下無而字忠臣下無也字又四百一叙行敏鎮潞州斬郭子咸事亦云武德初通鑑載黑闥陷厯亭行敏被殺事在武德四年八月丁未

程袁師

高宗時有孝子表師年十二喪父母以孝聞晝夜負土爲墳又葬祖父母經二十載其功始畢有白狼號鳴於墓側詔旌表其門御覽九百九 案新書孝友傳有程袁師與此條事跡約同表師必程袁師之誤蓋姓程名袁師也此條疑舊書孝友傳逸文又案冊府七百五十七正作程袁師年十二上有宋州人三字叙其事較御覽詳

武宏度

武宏度士護兄子也父卒廬於墓側晨夕哀號有野狸每至宏度齋時必來求食往來馴狎無驚懼時以爲孝感

御覽九百十二 冊府七百五十七士護上有贈司徒三字兄上有之字叙此事較御覽詳墓側下有負土爲墳四字無驚上

有曾字時以爲孝感作帝間之下詔褒美旌表之 案新書宏
度在孝友傳疑此條乃舊書孝友傳逸文

施士丐

文宗每對宰臣未嘗不深言經學李石因奏施士丐春秋可讀上
曰朕嘗覽之穿鑿之學貴爲異同耳學者如鑿井然得美水則已
何必辛苦旁求然後爲得也

御覽六百八 冊府四十宗下有卽位二字臣下有等字可作
堪貴作徒旁作傍得上有有字 案以文宗紀及李石傳考之
其爲相在太和九年十一月其罷相在開成三年正月此事未
詳可年新書儒學啖助傳後附施士丐傳亦叙此事舊書儒學
陸質傳內有助事而無士丐事疑此條乃彼處逸文

秦鳴鶴

秦鳴鶴爲侍醫高宗苦風眩頭重目不能視武后亦幸災冀行其志至是疾甚召鳴鶴張文仲診之鳴鶴曰風毒上攻若刺頭出血卽愈矣天后自簾中怒曰此可斬也天子頭上豈是試出血處耶上曰醫之議病理不加罪且吾頭重悶殆不能忍出血未必不佳命刺之鳴鶴刺百會及腦戶出血上曰吾眼明也言未畢后自簾中頂拜謝之曰此天賜我師也躬負繪寶以遺鳴鶴

御覽七百二十三 案張上脫與字 通鑑二百三叙此事在

宏道元年十一月注引舊傳云鳴鶴鍼微出血頭疼立止 案

據此則舊書本有鳴鶴傳矣冊府八百五十九叙此事文畧異云在永淳初及腦戶出血下有如碁二字吾眼明也作吾眼似明矣后自至以遺鳴鶴作簾中出綵百匹以賜鳴鶴大唐新語卷九苦風眩上有末年二字武后亦幸災冀行其志作則天幸

災逞已志潛遏絕醫術不欲其愈至是作及張文仲在鳴鶴上
卽愈作則愈天后作則天下無自字斬下無也字耶字下有鳴
鶴叩頭請命六字上作高宗下同命刺之上有朕意決矣四字
明也作明矣后作則天頂拜謝之作頂禮以謝鳴鶴等以遺鳴
鶴作以遺之下有高宗甚愧焉五字 案鳴鶴精於醫術與張
文仲相仿此條當是方技傳逸文

蘇澄

有患應病者問醫官蘇澄云自古無此方今吾所撰本草網羅天
下藥物亦謂盡矣試將讀之應有所覺其人每發一聲腹中輒應
唯至一藥再三無聲過至他藥復應如初澄因爲處方以此藥爲
主其病自除

御覽七百三十八 案澄亦精於醫術此條疑方伎傳逸文

郭宏道

隋尙食奉御郭宏道字大寶宏農華陰人也性寬宏如愚而內敏仕隋歷通事舍人滄州長史煬帝時徵爲奉御時高祖爲殿內少監深善之亟相往來情契愈昵宏道善相因言曰公天庭伏犀下接於眉此非人臣之相願深自愛高祖取宏道銀盆置之于地引弓射之謂宏道曰倘言有驗一發中之旣發應弦而中宏道曰願公事驗之後賜賞金盆高祖大悅

御覽七百三十一 冊府二十一叙此事庭作中願作宜倘作向一上有當字後作日又八百六十同而文較御覽畧公事驗上有令字 案宏道精於相術與袁天綱張憬藏相類此條疑亦方技傳逸文

韓凝禮

元宗之爲潞州別駕將入朝有軍人韓凝禮自謂知五兆上因以食箸試之旣布卦一箸无故自起凡三偃三起觀者以爲大吉徵旣而誅韋氏定天保因此行也凝禮起家五品

御覽七百二十八 案元宗紀來朝京師將行使術士韓禮筮之著一莖孑然獨立禮驚曰著立奇瑞非常也不可言與此條文義不同疑此條乃方伎傳佚文 又案保疑位之誤

趙師

趙師字耶利天水人也在隋爲知音至唐貞觀初獨步上京遽入琴苑疇之嵇氏累代居曹遂今曹郡琴者所修五弄具列於曹妙傳濮州司馬氏琴道不墜於地也師云吳聲清宛若長江廣流絃絲徐逝有國士之風蜀聲躁急若擊浪奔雷亦一時俊快也

御覽五百七十九 冊府八百五十七在隋爲知音作善琴無

至唐二字遽入至地也未引師云作嘗云宛作婉亦一時下無
俊快二字蓋傳寫脫去耳事類賦注十一引與冊府同惟無天
水人也四字婉仍作宛擊作激快下無也字 案師精於音樂
與李嗣真裴知古相同此條似亦方伎傳逸文

僧萬迴

僧萬迴閬鄉人也恆諧以狂發言屢中其兄戍邊五載母思之萬
迴年幼請詣兄所策竹馬去經宿返白母曰兄還矣請辦餅更往
迎之數日持襪乃戍子衣也尋而子至母大驚

御覽八百六十 案以當作似持襪下疑有脫字 又案萬迴
爲僧而有奇術與元奘一行等相近疑此條亦方伎傳逸文

李謹行妻劉氏

咸亨中燕山道總管右領軍大將軍李謹行大破高麗叛徒於瓠

盧河之西俘獲數千人自是平壤餘衆走投新羅時謹行妻劉氏留在代奴城高麗引韃靼攻之劉氏擐甲率衆守城久之賊乃退上嘉其功特封爲燕郡夫人

御覽二百二 案高宗紀云咸亨四年閏五年丁卯燕山道總管李謹行破高麗叛黨於靺廬河之西高麗平壤餘衆遁入新羅而未載劉氏事疑此係列女傳佚文通鑑載此事在咸亨四年閏五月 又案通鑑盧作蘆代作伐羯作靺郡作國文亦與御覽約同新書此事見高麗傳

麴昭母某氏

交河王麴崇裕兄昭少好學嘗有鷺異事書於市者其母將爲買之搜索家財不足其價唯篋中有金釧數枚旣而歎曰何愛此物令吾子不有異聞乎促令貨易此書昭後厯官司膳卿頗以詩詠

流譽

御覽七百一十八 案此條疑亦列女傳逸文 又案新書此
事見高昌傳

唐書逸文卷十一

通鑑校葉
男

舊唐書逸文卷十二

甘泉岑建功輯

列傳

環王

貞觀中林邑王梵頭黎死率國人共立頭黎女爲王諸葛地頭黎之姑子女王獨任國中不置大臣司倫翁定乃立地爲王妻之以女王其國乃定諸葛地自立後遣使司倫因地盤獻火珠狀如水精日午時正以珠承影取艾蒸之火見云得之於羅刹國今之環王國主卽梵志之後在日南郡西陸行一千餘日方至

御覽七百八十六 通典一百八十八梵作范黎作利下同諸葛地下有者字獨任作獨在司倫作可倫下同正在日字下蒸作衣一千作二十冊府九百七十載永徽五年五月林邑獻馴

象 案新書南蠻傳言環王本爲林邑所述事跡與此條約同
舊書但言林邑不言環王所述事跡與此條迥異蓋此言先立
女王後立諸葛地彼言先立婆羅門後立女王本屬傳聞異辭
疑此條乃環王國傳與今本林邑國傳原係各自爲篇誠以國
名既殊故並存以俟考新書遂以環王爲主而不標林邑之名
舊書又逸去環王止存林邑之號故不免彼此參差耳 又案
外國傳之逸文國名爲今本所有者已附於卷十之末國名爲
今本所無者悉載此卷之中舊書外國傳次第先敘突厥迴紇
吐蕃三大國次叙南蠻西南蠻次叙西戎東夷而終於北狄今
畧仿其例依類編次而不顯著東西南北之名以免武斷之失
至於環王國雖本林邑之地而今本旣無環王之名故特錄於
此卷以昭畫一之例焉

羅刹

婆利東有羅刹國其人極陋朱髮黑身獸牙鷹爪時與林邑人作市以夜而來自掩其面其國出火珠狀如水精日午時以珠承影取艾依之即火出

御覽八百三 會要九十九東作界以夜上仍有市字無來字精作晶日下有正字依作承 事類賦注卷九與上無時字作上無人字 通鑑注一百九十三與上無時字影上有日字即作則 案通鑑注雖未明言舊書然此條本新書所無且與御覽會要事類賦注相合其爲舊書無疑通典一百八十八以夜而來作輒以夜自作晝日則無其國以下二十三字 案舊書有婆利傳無羅刹傳新書則婆利羅刹皆附環王傳後

殊奈

貞觀二年殊柰國遣使貢方物殊柰者崑崙人也在林邑南去交趾海行三月餘日俗習文字與婆羅門同路絕遠古未嘗朝中國至是始通

御覽七百八十八 會要九十八俗在習字下二年下有十月二字文亦畧異冊府九百五十七引自在林邑起至餘日止

案新書殊柰國附環王傳

甘堂

甘堂國在大海之南崑崙人也貞觀十年與末俱婆國同日朝貢太宗謂侍臣曰南夷西域自遠而至其故何也房元齡對曰當中國乂安帝德遠被也太宗曰誠如公言向使中國不安何緣而至朕何德以堪之

御覽七百八十八 會要九十九堂作棠末作朱婆作波同日

在朝貢下下仍有至字侍作羣夷作荒何也作何哉遠作遐以
堪之上無德字下有觀此蕃使益懷畏懼所望公等匡朕不逮
也十七字冊府九百五十七堂亦作棠惟有大至人也九字
案新書堂亦作棠附環王傳

文單

自永徽以來文單國屢獻馴象凡三十有二皆象於禁中頗有善
舞者以備元會充庭之飾及德宗卽位曰王者不尙異物不貴難
得之貨今官用費而物性不得非宜也悉放於荆山之陽

御覽八百九十 事類賦注二十節引永上無自字二上無有
字德上無及字得作遂放上無悉字 案通鑑載此事在大歷
十四年閏五月其時德宗已卽位德宗紀云詔文單國所獻舞
象三十二令放荆山之陽亦在是年閏五月丁亥 案新書文

單國卽真臘國在南蠻傳內

參半

武德中參半國遣使朝貢其國在真臘西南千餘里城臨大海土地下濕風俗物產並與林邑國同

御覽七百八十六 冊府九百五十七參半國上無武德中三字下無遣使朝貢四字引至下濕止無風俗以下十字 案新書參半國附真臘國後

白頭

貞觀中扶南來獻白頭國二人於洛陽云其國在扶南之西參半之西南男女皆至素首身又疑白居易山洞之中四面巖險故人莫至與參半國相接

御覽七百八十六 通典一百八十八來作又陽下無云字參

半上仍有在字男女下有生字皆下無至字冊府九百五十七
僅載在扶南之西參半之西南二語 案新書白頭國附扶南
國後在南蠻傳

投和

貞觀中投和國遣使奉表以金函盛之又獻金槿

若盍反

金鎖寶帶

犀象海物等數十品

御覽七百八十八 通典一百八十八叙此國較御覽詳貞觀
下無中字餘同 案新書亦有投和國在南蠻傳

多蔑

多蔑國貞觀時通焉在南海外界週迴可一月行南阻大海西俱
遊國北波利利刺國東眞陀洹國戶口極多置三十州不役屬他
國有州郭宮殿樓櫓並用瓦木以十二月爲歲其物產有金銀鐵

象牙犀角朝霞朝雲等布其俗交易用金銀朝霞等爲賈百姓二十而稅一五穀菜蔬與中國不殊

御覽七百八十八 通典一百八十八時作中外作邊北波下無利利二字真陀作陁爲歲下有首字無等布二字爲賈作衣服蔬在菜字上會要一百在南海外界作居大海之北一月作兩月阻作至下無大字北波下亦無利利二字戶口上有其王姓摩伽名失利八字多作衆不役作又役宮殿在樓櫓下並下無用字以十二月之上文較御覽詳歲下亦有首字其物產之下亦與御覽畧異冊府九百五十七無貞觀時通焉五字引至俱遊國北止俱上亦有阻字 案新書南蠻傳有名蔑國所述事跡與此條約同疑名蔑乃多蔑之誤

多摩長

多摩國長居國長居於海島東與婆鳳西與多隆南與半支跋華
言五山也北與訶陵等國接其國界東西可一月行南北可二十
五日行其王子先龍子也名骨利骨利得大鳥卵剖之得一女子
容色殊妙卽以爲妻其王尸羅劬傭伊說卽其後也顯慶中遣使
貢獻其俗無姓王居以柵爲城以板爲屋坐師子坐東向衣物與
林邑同勝兵二萬人無馬有弓刀甲稍婚姻無同姓之別其食器
銅鐵金銀所食尙酥乳酪沙糖石蜜其家畜有殺羊水牛野獸有
麋鹿等死亡無喪紀之制以火焚其屍其音樂略同天竺自波那
婆宅護遮菴磨石榴等果多甘蔗從其國往薩盧都思訶盧林邑
等國達於交州

御覽七百八十八 通典一百八十八多摩國長居國長作多
摩長國半支作羊支王子作王之師子作獅子次坐字作座二

萬下有餘字喪紀作喪服自波那作有波那往作經訶盧下仍有君那盧三字會要一百長作葛居於上亦止有多摩葛三字海島上有南字其王子先龍子也作中使云其王先祖骨利龍之子骨利得大作利常得一卽以作因以其王尸羅作今尸羅傭下無伊說二字顯慶中遣使貢獻作顯慶四年二月朝貢使至無其俗以下云云冊府九百五十七摩作縻居於上止有多縻長國四字支作友引至二十五日行止無其王以下云云又九百五十六縻又作靡引自顯慶中至卽其後也止文與會要約同 案新書長亦作葛附瞻博國後在南蠻傳

哥羅舍分

哥羅舍分國在南海之南接墮和羅勝兵二萬人其王蒲越伽摩顯慶五年遣使朝貢

御覽七百八十八 通典一百八十八分下無國字接上有其
國地三字羅下亦有國字蒲作滿會要一百分下亦無國字勝
兵作精兵句在伽摩下其王作其國王名摩在伽字上顯慶五
年遣使朝貢作其使以顯慶五年發本國至龍朔二年五月到
京冊府九百五十七接上有東字羅下有國字勝兵亦作精兵
此句亦在摩字下其王下有名字伽在越字上引至二萬人止
無顯慶以下八字 案新書哥羅舍分國亦附瞻博國後

金利毗逝

金利毗逝國在京西南四萬餘里東去致物國二千里西去赤土
國一千五百里南去波利國三千里柳衡國三千里其國有城邑
庭舍衣朝霞白疊每食先泥上鋪席而後坐國王名本多揚牙前
有隊仗甲盔貝多樹皮其風俗物產與貞臘同

御覽七百八十八 會要一百逝作迎京下有師字東去上有
行經曰巨國訶陵國摩訶國新國多薩國者埋國婆婁國多郎
婆黃國摩羅遊國真臘國林邑國乃至廣州四十一字致作至
南去波作南距婆脫去利國以下十六字疊作甄國王上有其
字揚作陽貝多上仍有甲用二字風俗上無其字貞作真臘下
有國字冊府九百五十七柳衡上有北去二字引至庭舍止無
衣朝霞以下云云 案新書無此國今考至其地者必由訶陵
真臘林邑等國則亦南蠻之類也

杜薄

杜薄國在扶南東漲海中直渡海數十日至其人色白皙皆有衣
服國有稻田女子作白疊華布出金銀鐵以金爲錢出雞舌香可
含以香人不見雞舌其爲水也氣辛而性厲禽獸不能至故未可

識其樹者華熟自零隨水而出方得之杜薄洲有十餘國城皆稱王

御覽七百八十八 通典一百八十八扶南上有隋時聞焉四字至上有而字人上有國字人不見作不入衣服爲水作爲木未可作未有冊府九百五十七引無其人色白皙至方得之杜薄七十五字 案新書無此國今考其國旣與扶南相近則亦南蠻之類也

頓遜

頓遜國出霍香插枝便生葉如都梁以裛衣國有區撥等花十餘種冬夏不衰日載十車貨之其花燥更芬馥亦未爲粉以傳身焉御覽七百八十八 通典一百八十八叙此國較御覽詳霍作藿十上有數字冊府九百五十七無出藿香等語而有在林邑

西南海嶠上地方千里城去海千餘里通典亦約有此數語惟
嶠下有山字 案新書無此國據通典冊府言在南海則亦南
蠻之類也

薄刺洲

薄刺洲隋時聞焉在拘利南海灣中其人色黑而齒白眼正赤男
女並無衣服一名勃焚洲

御覽七百八十八 通典一百八十八洲作國正作晴無一名
勃焚洲五字冊府九百五十七無隋時聞焉及其人色黑至並
無衣服二十字 案新書無此國今考其地既在南海之中則
亦南蠻之類也

西爨蠻

西爨者南蠻之渠帥也自云本河東安邑人也七世祖仕晉爲南

南寧太守屬中國亂遂王蠻夷梁元帝時南寧州刺史徐文盛徵詣
荊州有蠻獞者遂攜南寧之地延袤二千餘里俗多華民饒駿馬
明珠犀象獞死有二子震斃分統其衆隋開皇初遣使朝貢文帝
遣韋世沖將兵鎮之析置恭州協州昆州未幾復叛後遣史萬歲
擊之所至皆破踰西洱河臨滇池而還翫懼而來朝文帝誅之諸
子沒爲官奴不收其地因與中國絕高祖受禪拜翫子宏達因爲
昆州刺史持其父屍歸葬本鄉益州段綸又遣俞大施至南寧諭
其部落悉來歸歛自是朝貢不絕

御覽七百九十一 通典一百八十七帥下無也字有梁時通
焉四字人下無也字七世作七葉中國作中原盛作威攜作據
民作人無饒駿馬以下十二字統上無分字無隋開皇至因與
中國絕七十四字高祖受禪作大唐武德初宏作孔爲上有因

字持上有令字段綸上無益州二字論之作論其無由是二字
歸歟上無悉來二字自是朝貢不絕作三年七月遣使來貢方
物會要九十八帥下亦無也字太守上有州字攜亦作據民亦
作人亦無饒駿以下十二字殯死有二子作旣死其子統上亦
無分字亦無隋開皇以下云云昆州上無因爲二字以下與通
典同惟段綸上有益州刺史四字三年作武德七年七月下有
二十四日四字無遣使二字冊府九百五十七載此國甚畧但
云古南中地延袤二千里 案新書南蠻傳內有兩爨蠻傳松
外姚州巴東等蠻皆附其後

松外蠻

松外諸蠻貞觀末爲寇遣兵從西洱河討之其西洱河從嶺州西
五百里其地有數十百部落大者五六百戶小者二三百戶無

大君長有數十姓以楊李趙董爲名家各擅山川不相役屬自云其先本漢人自城郭村邑弓矢鏃言語雖小訛舛大略與中夏同有文字頗解陰陽歷數自夜郎滇池以西皆云莊厲之餘種也其土有稻麥粟豆種穫亦與中國同而以十二月爲歲首菜則葱韭蒜菁果則桃梅李柰有絲麻女工蠶織之事出絲絹線布廣七寸以下蠶以正月生二月熟畜有馬牛猪羊雞犬飯用竹筴搏之而取羹用象杯若雞彝有船無車男女毳皮爲帔女子絕布爲裙外仍披毳皮之帔頭髻一盤而成形如髻阻瓜切男女皆跣至於死喪哭泣棺槨襲斂無不畢備三年之內穿地爲坎殯於舍側上作小屋三年之外出而葬之蠡封畔棺取其耐濕父母死皆斬衰布衣遠者至四五年近者三二年然後卽吉其被人殺者喪主以麻結髮而黑其面衣常不緝唯服內不廢婚妻不避同姓其俗有盜竊

殺人淫穢之事酋長卽立一長木爲擊鼓警衆其會其下強盜者衆共殺之若賊家富强但燒其屋宅奪其田業而已

御覽七百九十 通典一百八十七擅作據自作有鋌上有矛

字屬作躋絲絹線作繩絹絲廣上有幅字蠶上有早字牛在馬

字上取羹作噉羹男女作男子以絕布作繩布外仍作衫仍之

外作而後蠶下有蚌字棺上無畔字取其作令其婚下有嫁字

妻上有娶字冊府九百六十桃下無梅字絲絹亦作繩絹廣上

有幅字寸下無以下二字有染色有緋帛五字二月作三月取

亦作噉象杯作烏梧若上有形字男女氍毹皮作男子以氍及皮

絕布亦作繩布外仍亦作衫仍之帔作以帔一盤上有有髮二

字之外作之後蠶封畔棺作以蠶蚌封棺取其亦作令其濕下

有豪富者殺馬牛祭祀親戚必會皆齋牛酒助焉多者至數百

人二十四字父母下無死字布衣下有不澡二字結作括黑其面作墨面衣常作衣服唯作雖婚下有嫁字妻上有娶字酋作尊警下無衆字賊家作賊宗而已下有不至於死四字冊府九百五十六君下無長字有皆不相統四字爲名作之擅下無山川不相四字役作一本漢人下卽接自夜郎二語屬亦作躡

姚州蠻

麟德元年五月於昆明之檉棟川置姚州都督府每年差兵募五百人鎮守武太后神功二年蜀州刺史張柬之上表曰姚州者古哀牢之舊國也本不與中國交通前漢唐蒙開夜郎滇竿而哀牢不附至光武季年始請內屬漢置永昌郡以統理之稅其鹽布毳罽以利中土其國西通大秦南通交趾奇珍進貢歲時不闕及諸葛亮五月渡瀘水收其金銀鹽布以益軍儲使張伯岐選其勁卒

以增武備前代置郡其利頗深今鹽布之稅不供珍奇之貢不入而空竭府庫驅率平人受役蠻夷肝腦塗地昔漢得利既多更置博南哀牢二縣蜀人愁怨行者作歌今於國家無絲髮之利在百姓受終身之酷伏乞省罷姚州使隸舊府歲時朝覲同之蕃國

御覽七百八十六 全唐文一百七十五英華六百十四及唐文粹二十七全載此文與舊書本傳約同御覽蓋節引通典一百八十七神功二年下有閏十月三字舊國下無也字渡瀘下無水字漢上無昔字既多下有厯博南山涉蘭倉水八字作歌下有蓋漢得其利人且怨歌九字伏乞上較御覽詳 又案張柬之傳其爲蜀州刺史在神功初未著明何年此云神功二年正與本傳可相互證而文義詳畧迥異故定爲姚州蠻傳逸文

巴東蠻

黃國公冊安昌者盤瓠之苗裔也世爲巴東蠻帥與田李向鄧各分盤瓠一體世傳其皮盛以金函四時致祭

御覽七百八十五

昆彌

昆彌國一曰出昆明西南夷也在爨之西洱河爲界卽葉榆河其俗與突厥略同相傳云與匈奴本是兄弟國也漢武帝得其地入益州部其後復絕諸葛亮定南中亦所不至武德四年嶺州治中吉宏使南蠻因至其國諭之至十二月遣使朝貢貞觀十九年四月右武侯將軍梁建方討蠻降其部落七十二戶九千三百

御覽七百九十一 通典一百八十七一曰下無出字至其上

無因字九千上有十萬二字會要九十八國下有者字一曰下亦無出字在作以榆河下有也字畧同下有去京師九千里勝

兵數萬人十一字益州下有郡字吉案下有偉字朝貢下有因
求內附自是每歲不絕其使多由黔南路而至近又封其別帥
爲滇王世襲其國三十二字四月下有二十日三字部落作諸
屯二下有所字九千上亦有十萬二字以下較御覽詳冊府九
百五十七一曰下亦無出字西下有以字洱誤作二榆河下亦
有也字亦有去京師九千里勝兵數萬人十一字下僅載漢武
至復絕數語餘未引武帝下有時字部作郡 案新書南蠻傳
有昆明國亦附兩蠻蠻傳

吐火羅

吐火羅國有頗梨山南崖穴中有神馬遊牝馬於其側馬產名駒
皆汗血馬

御覽八百九十五 會要九十九叙此國較詳有上有其城北

三字黎作黎崖作巖遊牝作國人每牧產上無馬字汗上無皆字汗血馬下有北界接西域大宛之地九字 事類賦注二十一黎作黎遊牝作國人每牧馬產作時產冊府九百六十一文尤詳備有上有城北二字頗上衍屋數二字遊作國人每牧馬產亦作時產汗血下有多善二字通典一百九十三有上有城北二字黎作黎遊牝作國人每牧馬產作時產其文亦較御覽爲詳 案新書亦有吐火羅國在西域傳

師子

師子國出朱砂水銀薰陸鬱金蘇合青木等諸香

御覽九百八十二 冊府九百五十六師作獅而文亦較此詳九百五十八同又九百六十一詳叙土風亦云多出奇寶而俱未及朱砂以下等物 案新書亦有師子國在西域傳

師子國在西海之中出奇寶商賈到則不見人但置寶物價直於洲上賈依價質之而去以能養師子故以爲國名

御覽八百二 會要九十九 二師字皆作獅海之作南海出上有有稜伽山四字商賈到則不見人作人到初無所見置作署價直下有賣字賈作商船質作貨以能養作其國以能馴養冊府九百六十一師亦作獅下同中有延表二千餘里六字出上有多字商上有本鬼神居之五字賈作人不見下無人字價下少直字賈作商人質作買以作其後鄰國人居之養上有馴字故以爲國名作遂以名國通典一百九十三商賈到則不見人作其國舊無人止有鬼神有龍居之但置寶物價直於洲上作但珍寶明其所堪價賈作商人質作取無而去二字以能養師子作能馴養神師子故作遂名上無國字

天寶中師子國遣婆羅門僧灌頂三藏來獻金寶瓔珞

御覽八百二 會要一百叙此事在天寶五載正月冊府九百六十一但云風俗與婆羅門同而尤敬佛法通典一百九十三同

曹

曹國出青黛安息青木等香

御覽九百八十二 案新書有曹國附康國傳後在西域傳

烏篤

烏篤國在中天竺南一名烏伏那地方五千餘里百姓殷實人性懦弱頗詭詐尤工禁術篤信佛法文字禮儀略同天竺自古不通中國貞觀中其王達摩因陀訶斯遣使獻腦香

御覽七百八十八 通典一百八十八同惟那作那會要九十

九篤作萇烏伏作烏枝那亦作那干上無五字慎作懦禁下有
呪之二字無文字禮儀四字略同天竺作與天竺同而天竺不
及之不通作未通中國下有焉字貞觀中作貞觀十六年十一
月其王至遣使獻腦香作朝獻使至下並載開元八年遣使冊
立國王事冊府九百五十七但云在中天竺南北萬三千餘里
冊府九百六十一篤又作長烏伏那作烏仗那無地方以下六
字禁下亦有呪之二字文字禮儀作語言文字禮義法式略同
天竺下有而弗之及也五字以下叙其國之土風較御覽詳而
無自古不通以下云云 案新書篤亦作萇附天竺二國後在西
域傳

蝦夷

蝦夷國海島中小國也其使鬚長四尺尤善弓矢插箭於首令人

戴觚而立數十步射之無不中者顯慶四年十月隨倭使入朝
御覽七百八十二 會要一百長上有至字觚作瓠倭下有國
字通典一百八十五觚作之數十作四十倭下有國字使下有
人字冊府九百九十七顯上有高宗二字年下無十月二字隨
倭作遣其使鬚長四尺在朝字下無尤善弓矢至中者二十三
字 案新書夷作蜺附日本國後在東夷傳

流鬼

流鬼國去京師萬五千里邊於北海多沮澤有魚鹽之利

御覽八百六十五 會要九十九萬上有一字邊於北海作直
黑水靺鞨東北少海之北三面阻海之利下較御覽詳云貞觀
十四年其王更三譯而來朝貢授騎都尉冊府九百六十一與
會要約同無去京師以下七字通典二百同邊於北海作在北

海之北北至夜久國餘三面皆抵大海南去莫設鞞羯船行十五日餘較御覽詳亦云貞觀十四年來朝 案新書有流鬼國在東夷傳

鞠

拔野古國東北五六日行至鞠國有樹無草但有地苔無羊馬豕畜有鹿如中國牛馬使鹿牽車可勝三四人衣鹿皮食地苔其人聚木枝爲屋尊卑共居其中

御覽一千 會要九十八無五字及但有地苔四字豕畜二字其人以下十三字 會要九十八叙此國較御覽詳六上無五字草下無但有地苔四字馬下無豕畜二字皮下仍有鹿字無其人以下十三字冊府九百六十一豕作家聚木作取木通典一百九十九叙鞠國在拔野古東北五百里六上無五字至鞠

作至其豕亦作家鹿上無有字其人作其國俗木下無枝字餘同 案新書鞠國附同鶻傳 又案舊唐書之迴紇卽新唐書之同鶻皆另自爲卷編於南蠻之前而不列於北狄之內鞠國及拔野古國駁馬國皆在北方新書之附於同鶻雖有明文舊書之附於迴紇究無顯證今列此三國於西戎東夷之後以俟考焉

拔野古

拔野古僕骨東境其地豐草人皆敦篤土多霜雪其地北東數十里曰康千河有松木入水一二年乃化爲石其色青有國人居住其人名之爲康千石後仍松文

御覽九百五十三 事類賦注二十四節引無拔野古三字東在北上數十作一千曰康千河作有康河松上無有字名作謂

之下無爲字干作于後仍作有 會要九十八僕上有在字其地至霜雪作勝兵一萬口六萬人皆殷富北東數十作東北一千乃作而名作謂無後仍松文四字 案新書拔野古國附同鶻傳 又案通典一百九十九草下有盛字敦篤作殷富北東數十里作東北千有餘里二年上無一字後仍松文作其松爲石以後仍似松文冊府九百六十一約同惟干又作干松木下無入水二字

駿馬

永徽中駿馬國遣使朝貢其地在突厥之北漸近北海去京師一萬四千里戶十萬勝兵二萬人馬三十萬正馬色並駿故以爲名相覽八百九十五 案高宗紀永徽三年十一月乙亥駿馬國遣使朝貢會要一百二年作二年而叙此國文較御覽詳無戶

十萬三字三萬下無人字馬下無三十二字名作國號冊府九
百六十一與會要約同而文尤詳備惟無永徽中及遣使朝貢
七字北海下無去京師至萬足二十一字通典二百與冊府約
同而永徽中遣使朝貢叙於其末京下無師字萬上無一字亦
無戶十萬三字勝作有並作竝爲名作名云 又案新書駁馬
國附回鶻傳

舊唐書逸文卷十一終

通鑑
校聚